

四庫全書

子部

欽定四庫全書

冊府元龜卷一百三十

宗 王欽若等撰

帝王部

延賞

虞書曰賞延於世春秋傳曰善善及子孫斯道德之政也三代而上靡得以記漢氏之後乃或錄元功之冑褒宗臣之裔賓禮賢者獎勸能吏旌揚忠烈甄叙舊故賞勤職之効采死政之孤繇是加其爵秩申之錫予俾奉

其嗣世而高其門閥使簪纓之不墜宗奠之有寄焉其或因旅愴之慶乘肆肯之澤大叙前世之勲籍並分三公之封邑乃至漏澤流根上延於祖考脂田析壤俯達於閨闈渥惠所覃息系咸及斯固霈恩紀於臣下集光寵於私門所以勸有位之盡心著為邦之令典者也

漢高祖八年九月封紀成子通為襄平侯初成以將軍從擊破秦入漢定三秦戰好時死事子侯

十年九月封周苛子成為高景侯初苛以內史從擊破

秦為御史大夫入漢圍取諸侯守滎陽功比辟陽侯罵
項籍死事子侯

十二年二月高梁侯酈齊父食其以客從破秦還定諸
侯常使使約和諸侯說齊王死事子侯

孝景中元年四月封故御史大夫周苛周昌孫子為列
侯

二年九月封故楚趙傅相內史前死事者四人子皆為
列侯初趙王遂與吳楚合謀起兵其相建德史火其姓內史

王悍諫不聽遂燒殺之遂自殺帝憐趙相內史守正死
封建德子橫遂侯悍子棄之新市侯又楚相張尚太傅
趙夷吾諫其王戊勿反不聽皆殺之故封夷吾子固為
高陵侯尚之子當居為山陽侯

武帝即位求賢良舉馮唐唐時年九十餘不能為官廼
以子遂為郎

元朔五年拜衛青為大將軍帝曰青躬率戎士師大捷
獲匈奴王其封青子伉為宜春侯不疑為陰安侯子登

為陰發侯

元狩中復詔御史以鄴二千四百戶封蕭何曾孫慶為
鄴侯布告天下令明知朕報蕭相國德厚也

元鼎五年三月封故校尉韓千秋摎樂子二人為列侯
初南粵王興與毋摎太后欲內屬相呂嘉有畔心漢遣
千秋與樂將二千人往嘉擊滅之於是天子曰韓千秋
雖無成功亦軍鋒之寇封其子延年為成安侯摎樂其
姊為王太后首領願屬漢封其子廣德為襲襲古侯

汲黯為淮陽守卒後武帝以黯故官其弟仁至九卿子
偃至諸侯相

宣帝本始元年正月詔曰故丞相安平侯敞等居位守
職與大將軍光車騎將軍安世建議定策以安宗廟功
賞未加而薨其益封敞嗣子忠敞楊也是年復下詔曰宣

成侯光

光霍

宿衛忠正勤勞國家善善及後世

善善者謂
褒寵善人

也其封光兄弟中郎將雲為冠陽侯又以車騎將軍光

祿勲張安世子千秋延壽彭祖皆中郎將侍中

地節二年大將軍大司馬霍光病篤帝自臨問即日拜
光子禹為右將軍

四年二月封故鄴侯蕭何曾孫建世為侯蘇武為右曹
典屬國以其前發匈奴時胡婦產一子通國為郎又以
武弟子為右曹

元康三年三月詔曰朕微眇時故掖庭令張賀輔導朕
躬修文學經術恩惠卓異厥功茂焉詩不云乎無德不
報封賀所子弟子侍中中郎將彭祖為陽都侯

所子者
言養弟

子以
為子

平帝元始二年詔曰漢興以來股肱在位身行儉約輕財重義未有若公孫弘者也其賜弘後子孫之次見為適者爵關內侯食邑三百戶

四年詔書追錄忠臣封王嘉子崇為新甫侯

後漢光武以鄧禹功高封弟寬為明親侯

李通南陽宛城人也自光武起兵以士君子之學且言識文事及光武即位有司奏請封諸皇子帝感通首創

大謀即日封通少子雄為召陵侯

卓茂初為密令及更始政亂以年老乞骸骨歸光武即位下詔曰前密令卓茂束身自修執節淳固誠能為人所不能為以茂長子戎為大中大夫次子崇為中郎給事黃門

王闔王莽時為牧守莽敗乃去官光武下詔曰武王克殷表商容之間闔修善謹勅兵起吏民獨不爭其頭首今以闔子補吏至墨綬

建武中錄舊德臣以孫寶孫伉為諸長

伉音抗諸琅琊之縣也

宣

秉為大司徒司直所得祿俸輒以收養親族其孤弱者

分與田地自無擔石之儲

齊人名小嬰為擔今江淮人謂一石為擔

卒於官

帝愍惜之除子彪為郎

來歙為中郎將討公孫述為刺客所殺帝賜策書曰中

郎將來歙攻戰連年平定羗隴憂國忘家忠孝彰著遭

命遇害嗚呼哀哉子褒嗣帝嘉歙忠節復封歙弟田為

宜西侯

杜林為大司空薨光武親自臨喪既葬除子喬為郎詔曰公侯子孫必復其始賢者之後宜宰城邑以喬為丹水長

馮異與諸將攻落門未拔

落門聚石在冀縣

病發薨于軍謚曰

節侯長子彰嗣明年帝思異功復封彰弟沂為祈鄉侯
建武十三年更封彰東緡侯食三縣

吳漢兄尉為將軍從征戰死封尉子彤為安陽侯帝以漢功大復封弟翕褒親侯吳氏侯者凡五國

岑彭征蜀為刺客所殺子遵嗣帝思彭功封遵弟淮為
穀陽侯

郭涼既平盧芳帝擢涼為中郎宿衛左右

明帝以鄧禹先帝元功拜為太傅居歲餘寢疾帝數自
臨問以子男二人為郎及薨帝分禹封為三國長子震
為高密侯襲為昌安侯珍為夷安侯

趙孝為衛尉弟禮為御史中丞帝嘉其兄弟篤行後卒
孝無子拜禮兩子為郎

司空袁隗薨子屯嗣帝追思隗忠擢屯為步兵校尉徙封西陽侯

宋均為河內太守政化大行以疾上書乞免詔除子條為太子舍人

章帝即位追賜朱勃子穀二千斛

東觀記曰帝下詔曰告平陵令丞縣人故

雲陽令朱勃建武中以伏波將軍爵土不傳伏闕陳狀不顧罪戾懷旌善之志有烈士之風詩云無言不讎無德不報其以縣見穀二千斛賜勃子若孫勿令遠詣闕謝

趙憲為太傅錄尚書事帝擢諸子為郎吏者七人長子

代給事黃門

憲自明帝時內典宿衛外幹
宰職正身立朝未嘗懈惰

傅育為武威太守護羗校尉擊叛羗戰死帝下詔追褒
美之封其子毅為明進侯七百戶

和帝時魯恭為光祿勳選舉清平京師貴戚莫能撓其
正後代呂蓋為司徒及從巡狩南陽除子撫為中郎賜

駙馬從駕

駙副也非正所乘皆為
副說文曰駙馬副馬也

安帝元初中鮮卑寇漁陽太守張顯率兵馬掾嚴授王
簿衛福功曹徐咸赴之授福等並為虜所殺詔書褒歎

各除子一人為郎中

鄧弘元初二年卒詔大鴻臚持節即弘殯封子廣德為

西平侯後以帝師之重

弘少治歐陽尚書授帝禁中

分西平之都鄉

封廣德弟甫德為都鄉侯又封弘兄黃門侍郎京子珍為陽安侯邑三千五百戶

建光元年二月大赦天下以公卿校尉尚書子弟一人為郎舍人

順帝即位以鄭安世子亮為郎初安帝廢太子為濟陰

王安世與太常桓馮大僕來歷等共正議諫爭及帝立
安世已卒追賜錢帛除亮為郎

張綱漢安中為廣陵守卒詔曰綱大臣之苗剖符統務
正身道下班宣德信降集劇賊張嬰等萬人息干戈之
役濟蒸庶之困未升顯爵不幸且卒嬰等緣杖若喪考
妣朕甚愍焉拜綱子續為郎中賜錢百萬

冲帝永嘉元年封武威太守趙冲子愷義陽亭侯冲順
帝時追叛羗戰歿至是故侯

桓帝時羊續父儒為太常續以忠臣子孫拜郎中

段熲為中郎將擊琅琊賊東郭寶公孫舉等大破斬之
獲首萬餘級除一子為郎中後以討先零東羗功詔以
家一人為郎中

胡奭為南郡太守李肅主簿時武陵蠻寇江陵肅奔走
奭諫止肅肅遂殺奭而走帝聞之徵肅棄市拜奭家一
人為郎

靈帝時陸康為議郎會廬江賊黃穰等與江夏蠻連結

十餘萬人攻沒四縣拜康廬江太守康申明賞罰擊破穰等餘黨悉降帝嘉其功拜康孫尚為郎中

張酺曾孫濟好儒學初揚賜薦濟明習典訓為侍講至司空病罷及卒帝以舊恩贈車騎將軍關內侯印綬追濟侍講有勞封子根為蔡陽鄉侯

臧洪父旻為揚州刺史擊破妖賊許昭遷為使匈奴中郎將洪年十五以父功拜童子郎

獻帝初袁術屯兵壽春遣其將孫策攻廬江太守陸康

圍城數重受敵二年城陷月餘發病卒年七十宗族百餘遭離饑厄死者將半朝廷愍其守節拜子為郎中

桓典為羽林郎獻帝即位三公奏典前與大將軍何進謀誅閹官功雖不遂忠義炳著詔拜家一人為郎

元尚為兗州刺史袁術將僭號欲以尚為太尉尚拒之為術所害帝嘉尚忠烈拜其子瑋為郎中

孫瑞為大司農為三老後為亂兵所害獻帝都許追論瑞功封子明澹津侯

魏文帝踐阼以程昱復為衛尉

昱自太祖建國為衛尉與中尉邢貞爭威儀免

進封安鄉侯增邑三百戶并前八百戶分封少子延及

孫曉列侯

董昭自太祖受魏公魏王之號皆昭所創及文帝踐阼拜大鴻臚進封右鄉侯二年分邑百戶賜昭弟訪爵關內侯又分邑百戶賜一子爵關內侯黃初二年分三公戶邑封弟子各一人為列侯

賈詡自文帝為五官將勸帝朝夕孜孜不違子道帝深

自砥礪及即位以詔為太尉進爵壽鄉侯增邑三百并
前八百戶又分邑二百戶封少子訪為列侯以長子穆
為駙馬都尉

荀攸長子緝有攸風早没次子適嗣無子絕黃初中紹
封攸孫彪為陵樹亭侯邑三百戶後轉封丘陽亭侯正
始中追謚攸曰敬侯

黃初四年涼州刺史張既薨詔曰昔荀桓子立勲翟士
晉侯賞以千室之邑馮異輸力漢朝光武封其二子故

涼州刺史張旣能容民畜衆使羣羗歸土可謂國之良臣不幸薨隕朕甚愍之其賜少子翁歸爵闕內侯

華歆薨子表嗣初文帝分歆戶邑封歆弟緝列侯

鍾繇薨子毓嗣初文帝分毓戶邑封繇弟演及子邵孫
豫列侯

文聘自太祖時為江夏太守使典北兵及帝踐阼以禦賊有功遷後將軍封新野侯分聘戶邑封聘子岱為列侯又賜聘從子厚爵闕內侯

張遼與李典嘗破孫權後遼薨子虎嗣帝追念遼典在
合肥之功詔曰合肥之役遼典以步卒八百破賊十萬
自古用兵未之有也使賊至今奪氣可謂國之爪牙矣
其分遼典邑各百戶賜一子爵關內侯虎為偏將軍

明帝青龍四年司空陳羣薨謚曰靖侯子泰嗣帝追思
羣功德分羣戶邑封一子列侯

張郃薨子雄嗣郃前後征伐有功帝分郃戶封郃四子
列侯賜少子爵關內侯

齊王即位孫資劉訪掌機密帝以訪資決定大謀增邑
三百訪并前千二百資千戶封愛子一人亭侯次子騎
都尉餘子皆郎中

王昶嘉平中為征南大將軍時文欽母丘儉作亂引兵
拒儉欽有功封二子亭侯關內侯

高貴鄉公甘露二年八月詔曰昔燕刺王謀反韓誼等
諫而死漢朝顯登其子諸葛誕創造凶亂主簿宣隆部
曲督秦絜秉節守義臨事固爭為誕所殺所謂無比干

之親而受其戮者其以隆絜子為騎都尉加以賜贈光
示遠近以殊忠義

三年大將軍錄尚書事司馬昭奏錄先世名臣元功大
勲之子孫隨才叙用

陳泰前後以功增邑二千六百戶賜子弟一人亭侯二
人關內侯

陳留王即位封征南將軍督荊州諸軍事王基子二人
亭侯關內侯

咸熙二年二月庚戌以虎賁張修昔於成都馳馬三詣
營言鍾會反逆以至沒身賜修弟倚爵關內侯

晉杜預為征南大將軍既平吳振旅凱入以功封子耽
為亭侯千戶

索綝為衛將軍領太尉時劉曜侵逼王城以綝為都督
征南大將軍持節討之破曜呼日逐王呼延莫以功賜
子弟二人鄉亭侯

明帝征王敦以諸葛恢為侍中加奉車都尉討王含有

功進封建安伯以先爵賜次子讜為關內侯

穆帝升平中改封大都督臨賀郡公桓溫為南郡公降臨賀為縣公以封其次子濟

毛穆之為桓溫參軍從溫平蜀以功賜次子都鄉侯

哀帝興寧中冠軍長史沈勁守洛陽為慕容恪攻陷神氣自若遂遇害朝廷聞而嘉之贈東陽太守子赤黔為大長秋

後魏明帝以許謙自太祖時有功其子洛陽從征慕容

寶為冠軍司馬後為祁令帝追錄謙功以洛陽為鴈門
太守

太武以宿石父沓干自明元時從討蠕蠕戰歿悼惜之
詔求沓干子時石年甫十一引見以幼聽歸年十三襲
爵為中散

谷渾為儀曹尚書在官廉直為太武所器重詔以渾子
孫十五已上悉補中書學生

屈拔垣之孫道賜之子拔少好陰陽學太武追思其父

祖年十四以為南部大夫

文成初以李靈學優選授經及踐阼為洛州刺史卒子
恢以師傅之子拜員外散騎常侍安西將軍長安鎮副
將進爵為侯

鉅鹿公源賀長子延性謹厚好學以功臣子拜侍御中
散賜爵武城子西治都將

陸侯為外都大官帝踐阼以子麗有策立之勲拜侯征
西大將軍進爵東平王

孝文太和十四年尚書李冲奏劉昞河右碩儒今子孫
沉屈未有錄聞賢者子孫宜蒙顯異於是除其一子為
郢州雲陽令

陸叡簡王麗之子為北部尚書太和十六年隆五等之
爵以麗勲著前朝封叡鉅鹿郡開國公食邑三百戶

宣武以張彞先朝勲舊不幸瘵廢特除其子始均長兼
左民郎中

高顯族道悅之長子也道悅孝文時為太子詢中庶子

詢以道悅數規諫殺之宣武追錄忠槩拜顯族給事中
源懷為車騎大將軍隴西王賀之子景明二年上表曰
昔世祖昇遐南安在位出拜東廟為賊臣宗愛所弑時
高宗避難龍潛苑中宗愛異圖神位未定臣亡父先臣
賀與長孫渴侯陸麗等奉迎高宗纂承寶命麗以扶負
聖躬親所見識蒙授撫軍大將軍司徒公平原王興安
二年追論定策之勲進先臣爵西平王皇興季年顯祖
將傳大位先臣時都督諸將屯於武川被徵詣京特見

顧問先臣固執不可顯祖久乃許之遂命先臣持節授
皇帝璽綬於高祖至太和十六年麗息劼狀私書稱其
亡父與先臣援立高宗朝廷錄封劼鉅鹿郡開國公臣
時丁艱草土不容及例至二十年除臣雍州刺史臨發
奉辭面奏先帝申先臣舊勲時蒙敕旨但赴所臨尋當別
判至二十一年車駕幸雍臣復陳聞時蒙敕旨征還當
授自宮車晏駕遂爾不申竊惟先臣遠則援立高宗寶
歷不墜近則陳力高祖神器有歸如斯之勲超世之事

麗以父功而獲山河之賞臣有家勲不需茅社之錫得
否相懸請垂裁處詔曰宿老元丕云如所訴訪之史官
頗亦言此可依比授馮翊開國公邑百戶

孝明正光中高諒為驍騎將軍徐州行臺屬元法僧反
叛逼諒同之諒不許為法僧所害朝廷痛惜之下詔曰
諒臨危授命誠節可重復贈使持節平北將軍幽州刺
史贈帛二百疋優一子出身謚曰忠侯

明亮為陽平汲郡二太守有惠政孝昌二年詔追前功

重贈平東將軍濟州刺史拜其子逸遠奉朝請

崔光為車騎大將軍儀同三司領著作光年耆老雖疾
病稍增而強不已嘗在著作疾篤不歸孝明親臨省疾
詔斷賓客中使相望為止聲樂罷諸遊眺拜長子勵為
齊州刺史

孝莊以原文宗學涉機警少有名譽永安中以父功賜
爵臨穎縣伯

羊敦字元禮太山平陽人梁州刺史禮弟子也性尚閒

素學涉書史以父靈引死王事除給事中

楊侃為北中郎將以河橋之功除其長子師為秘書郎
前廢帝以符賢郎王神貴子彥鴻為奉朝請房景先為
太學博士作五經疑問百餘篇神貴答之名為辨疑奏
上之帝親自執卷與神貴往復嘉其用心特除彥鴻為
奉朝請

帶方侯羅伊利卒子何奴亦忠實寡言有志度以勲臣
之子除侍御中散襲爵

爾朱文殊榮之子也帝以榮有破葛賊之勲進文殊爵為王增邑千戶超授散騎常侍撫軍將軍

西魏文帝以于義太師謹之子少矜嚴有操尚篤志好學以父功賜爵平昌縣伯

賀若誼字道機父統為右衛將軍誼性剛果有幹略以功臣子賜爵容城縣男

恭帝元年以車騎大將軍劉雄從于謹平江陵進驃騎大將軍開府儀同三司賜奴婢一百口別封一子汧源

縣伯又以從平并州拜上大將軍進爵趙郡公邑二千戶舊封回授一子

後周尉遲運少強濟志在立功魏大統十六年以父勲封安喜縣侯

豆盧勳聰悟有器局少授業國子學畧涉文藝文帝以勳勲臣子封義安縣侯

李穆為都督河橋之戰太祖馬中流矢隆穆以馬授文帝遂得俱免擢授武衛將軍賜穆子惇安樂郡公姊一

人為郡君自餘姊妹並為縣君兄弟子姪及總麻以上親并舅氏皆霑厚賜其見褒崇如此

尉遲端兄運為驃騎大將軍從楊志攻齊之并州以功別封端保城縣侯邑一千戶

閔帝時獨孤信進位柱國大將軍錄前後功增封聽迴授諸子於是第二子善封魏寧縣公第三子穆必安縣侯第四子藏義寧縣侯邑各一千戶第五子順武城縣伯第六子陁建忠伯邑各五百戶

明帝武成初驃騎大將軍高琳從賀蘭祥征吐谷渾以
勲別封一子許昌縣公邑一千戶

宇文盛為驃騎大將軍從賀蘭祥平洮陽共和二城封
一子甘棠縣公

武帝保定三年二月詔魏大統九年以前都督以上身
亡而子孫未齒叙者節級授官

建德六年伐齊平鄴詔曰自晉州大陳至於平鄴身殞
戰傷者其子即授父本官

韋孝寬為徐州總管詔以平淮南之功別封一子滑國公

韋壽為京兆尹以父鄆國公孝寬軍功賜爵永安縣侯
邑八百戶

魏文思左僕射寬之子年十一拜車騎大將軍儀同三
司散騎常侍尋以父功封新豐縣子邑五百戶

宇文愷字安樂杞國公忻之弟也以功臣子年三歲賜
爵雙泉伯七歲進封安平郡公邑二千戶

權武襲慶之子也父為開府以力戰死武以忠臣起家拜開府襲爵齊郡公邑千二百戶

隋文帝以李穆為并州總管帝以穆勞効同破鄴第一勲加三轉聽分授其二子榮才及兄賢子孝軌榮及才並儀同大將軍孝軌進開府儀同大將軍又別封子雄為密國公邑三千戶

開皇十七年詔曰周歷告終羣凶作亂釁起藩服毒被生人朕受命上玄廓清區宇靈聖垂祐文武同心申明

公穆耶哀公孝寬廣平王雄蔣國公睿楚國公勣齊國
公頴越國公素魯國公慶則新寧公長又宜陽公代積
趙國公羅雲隴西公詢廣業公景真昌公振沛國公譚
項城公子相鉅鹿公子幹等登庸納揆之時草昧經綸
之日丹誠大節心奉帝圖茂績殊功力宣王府宜弘其
門緒與國同休其世子世孫未經州任者宜量才昇用
庶享榮位世祿無窮

楊素為內史令以平江南賊功拜素子玄獎為儀同又

以討江南李稜等賊帝以素久勞於外詔令馳傳入朝
加子玄感官為上開府後為僕射又以破突厥功進子
玄感位為柱國玄縱為淮南郡公又以破達頭可汗加
子玄感位大將軍玄獎玄縱積善上儀同又以獻皇后
山陵制度多出於素上善之別封一子義康公郡邑萬
戶子子孫孫承襲不絕又以討平漢王諒功拜其子萬
石民行姪玄挺皆儀同三司

韋協字欽人廣州總管洸之子其父在廣州有功帝令

協濟詔書勞問未至而父卒上以其父身死王事拜協
柱國

趙元淑父世模初事高寶寧後以衆歸國授上開府寓
居京兆之雲陽文帝踐阼嘗典宿衛後從晉王伐陳先
鋒遇賊力戰而死朝廷以其身死王事以元淑襲父本
官賜物二千段

來護兒為上開府破高智惠盛道延進位柱國仍留長
子楷為千牛備身

王猛為將經略嶺表仍討平山越馳驛奏聞文帝以其
長子績為開府儀同三司猛子尋卒於廣州帝聞而痛
之命其子善襲仍授普州刺史

楊義臣父崇開皇初封泰興公擊突厥力戰而死贈大
將軍豫州刺史以義臣襲宗官爵義臣尚幼養於宮中
年未弱冠奉詔宿衛千牛者數年賞賜甚厚

煬帝大業初皇甫誕為漢王諒并州司馬諒反誕抗節
而死帝封弘義公子無逸嗣大業令行舊爵例除以無

逸誠義之後賜爵平興侯

麥孟才鐵杖之子字智稜果烈有父風帝以孟才節將子恩賜殊厚拜虎賁郎

馮慈明為尚書兵曹郎時李密逼東都慈明抗節為其所害梁通郡守楊江上狀帝歎息之贈銀青光祿大夫拜其二子惇怍俱為尚書承務郎

唐高祖武德二年四月伊州總管張善相為王世充兵所攻陷賊執善相送於世充善相辭色不撓世充怒令

斬之善相罵世充極口而死高祖聞而歎曰吾負善相
善相不負吾也封其子為襄城郡公

張孝珉為驃騎將軍經略王世充為賊所殺高祖聞而
傷之拜其弟度脫為大將軍封郡公賜帛二百疋

高蒲政為朔州總管右虞候杜士遠所殺高祖以其子
玄積為上柱國榮國公食邑三千戶

張長遜為五原太守會處羅可汗解兵去高祖大悅封
其父暉為遂安郡公

太宗貞觀五年九月癸亥詔曰惟王建國厚禮被於元
勲惟帝念功茂賞隆於延世是以親賢作屏著在周經
支庶畢侯義存漢典開府儀同三司齊國公無忌尚書
左僕射邢國公玄齡故尚書右僕射蔡國公如晦靈州
都督吳國公尉遲敬德左光祿大夫吏部尚書許國公
高士廉兵部尚書潞國公侯君集右衛大將軍郢國公
宇文士及左武衛大將軍翼國公秦叔寶瀘州都督宿
國公程知節等或宇量凝深地兼賢戚或風鑒弘遠功

參帳幕或志懷強正便繁左右幹略宏舉契濶戎旃或
委質藩朝陳力王室誠著出納節表屯夷經文緯武忠
勤懇至固已契叶風雲寄深舟楫雖褒賢之道已紀於旂
常而推恩之令未洽於冑緒宜賜寵章式遵故實無忌
玄齡如晦敬德各封一子郡公士庶君集士及叔寶知
節各封一子縣公俾夫拜前拜後比蹤曩烈如帶如礪
垂裕後昆

屈突通貞觀中為洛州都督卒太宗幸洛陽宮思通忠

節拜其少子詮果毅都尉

宇文士及貞觀中檢校涼州都督涼土服其威惠入為
衛大將軍錄其功封一子為新城縣公

李勣為右武侯大將軍封其父蓋為濟陰王蓋固辭王
爵乃封舒國公授散騎常侍陵州刺史勣貞觀中為遼
東道行軍大總管攻破蓋牟遼東白崖等數城又從太
宗推殄駐蹕以功封一子為郡王

王珪貞觀中為禮部尚書與諸儒正定五禮書成封一

子為縣男

段志玄為鎮軍大將軍寢疾太宗親自臨視顧謂曰當與卿子五品志玄頓首固請迴授母弟志感太宗遂授志感左衛郎將

高宗永徽三年五月詔隋儀同三司豆盧毓御史中丞游楚客齊侍中崔季舒給事黃門侍郎裴澤並門標忠鯁風烈可尚其子孫等並令所司量才處分

九月以周司沐大夫裴融尚書左丞封孝琰有忠節於

前代制擢其子孫以旌介烈

總章元年三月詔曰西漢元勳緝禮崇於末嗣東京列將茂賞覃於後昆繼絕興亡同歸一貫皇家受命蒼昊肇膺玄籙恢張宇宙蕩一寰區御乾立極之圖諒資天啟撥亂經邦之略實賴人謀締想初基有足言者或委質唐郊首參一旅勤著荆棘勞宣草創或策名代邸先鷗六飛誠備艱虞志踰金石咸以攀鱗上漢捧日登山氣叶風雲情均魚水其太原元從西府舊僚今親詳覽

具為等級贈司徒并州都督忠孝公士彘贈司馬淮安
郡王神通贈開府儀同三司并州都督夔國公劉弘基
贈并州都督渝國公劉政會贈開府儀同三司并州都
督莒國公唐儉贈左衛大將軍特進譙國公竇琮贈荆
州都督邳國公長孫順德贈護國大將軍涼州都督竇
國公史大業贈幽州都督濮國公龐卿運贈左武衛大
將軍潭州都督巢國公錢九隴贈華州刺史霍國公柴
紹贈潭州都督羅國公張平高贈相州刺史工部尚書

河東郡公裴寂贈洪州都督樂安郡公李思行贈洪州
都督廬陵郡公秦行師贈靈州都督貞定郡公許緒贈
涼州都督江夏郡公李高遷贈齊州刺史劉義節贈太
尉中國公士廉贈司空蔣國公通贈太尉并州都督梁
國公玄齡贈司空蔡國公如晦贈司徒并州都督鄂國
公敬德贈輔國公大將軍楊州都督褒國公段志玄贈
驃騎大將軍益州都督宿國公程知節贈徐州刺史胡
國公秦叔寶贈左衛大將軍涼州都督郢國公宇文士

及贈左驍騎大將軍荊州都督鄴國公張公謹贈荊州
都督懷寧縣公杜公綽贈荊州都督沔陽公公孫武達
贈荊州都督遂安郡公李安遠贈代州都督同安郡公
鄭仁泰贈荊州都督漢東郡公李孟嘗贈幽州都督歷
陽縣公獨孤彥雲故始州刺史襄武郡公劉師等並立
為第一等功臣其家見在朝無五品已上官者子孫及
曾孫擢一人授五品官若先有四品五品官者加授子
孫第一人兩階若三品已上加爵三等其第二等功臣

見在朝無五品已上官者子孫及曾孫推一人授從六品已上官若先有五品已上官加一階六品官者加兩階三品已上官者加爵一等

咸亨五年劉仁軌為鷄林道大總管東伐新羅以功子姪三人並授上柱國州黨榮之號其所居為樂城鄉三柱里

蘇定方前後滅三國皆一擒其主賞賜珍寶不可勝紀仍拜其子慶節為尚輦奉御及定方為左驍衛大將軍

封邢國公又別封子慶節為武邑縣公


中宗神龍元年贈故大理卿徐有功越州刺史授一子

官

二年中書令齊國公魏元忠與武三思等撰則天皇后
實錄二十卷編次文集一百二十卷中宗稱善封元忠
子衛王府諮議參軍昇為任城縣男是年韋安石為中
書令子陟始十歲拜溫王府祭酒

睿宗太極元年五月親祀北郊詔桓彥範敬暉崔玄暉

袁恕已張柬之等其子孫並實封二百戶



冊府元龜卷一百三十

欽定四庫全書

子部

冊府元龜卷一百三十一至
四

詳校官中書臣涂日煥

員外郎臣牛稔文覆勘

總校官庶吉士臣何思鈞

校對官中書臣王璜

校對官典簿臣郭祚熾

謄錄監生臣趙位堂

謄錄監生臣楊其梓

欽定四庫全書

冊府元龜卷一百三十一 宋 王欽若等 撰

帝王部

延賞第二

唐玄宗開元元年十二月詔國初以來宰相及食實封
功臣子孫一應沈翳未承恩者量才擢用

二年正月制曰崔玄暉張柬之等往以神龍之初保又
王室奸臣所忌謫居炎海流落變衰感激忠義玄暉嗣

子吏部郎中璩清才雅韻謹守專直東之嫡孫必祖考
繼歿遺孤可傷彼勲業之下淪佇名賢之必復是得景
倩而悲仲宣者也高皇封樂毅之後武帝求蕭何之裔
斯不遠哉昭於德音緬懷先烈宜加後命璩必並可朝
散大夫

四月以太常寺大祝蘇又為左補闕追父勲也勅曰蘇
又其父往處台衡實為柱石直言正色挫彼凶邪頃者
念功錫以真賦凡頌又遵先誠固辭令賞泣血披誠不

恐移奪自家刑國父忠子孝宜有褒崇寵及兄弟諫官
之任允屬象賢可右補闕

十月王海賓為安豐軍使先鋒與吐蕃戰歿嗣初名訓
年始九歲以父死於王事起復拜朝散大夫尚輦奉御
賜名忠嗣養於禁中累年與皇太子在忠王邸令與之
游處

六年侍中宋璟亡父玄撫褒贈邢州刺史玄撫初贈岐
州長史及璟登宰輔之任脩祔廟之禮帝乃特以伯牧

光寵焉并贈其母崔氏為安平郡夫人

八年隴右諸軍節度大使郭知運為幽州都監王峻討平六州胡康待賓等拜左武衛大將軍授一子官

九年十二月初中書門下六尚書御史大夫諸衛大將軍及食實封功臣并二品已上官咸以勳業受國寵榮德之所效澤之所延其亡父無五品已上官者並宜褒贈

十三年十一月封禪禮畢制曰朕永惟王業翳賴舊勳

元首股肱其猶一體自武德以來功臣宰輔或名存王府遺嗣沉淪或身無大故銜屈泉壤宜令所司訪擇申理唐興立功官又往屬艱難能盡忠義今成大禮何日忘之宜各與一子出身

十七年十一月追贈中書令蕭嵩亡父故渝州長史灌為吏部尚書門下平章事裴光庭父故禮部尚書行儉為太尉

二十四年正月勅諸道採訪使信安郡王祿嗣魯王道

堅牛仙客宗詢劉日正班景倩唐昭各賜一子官賞其
巡察之勞也是年中書舍人孫逖自以通籍禁闈其父
官纔邑宰乃上表陳情曰臣父嘉之幸遇明時早勤學
業出身入仕四十餘年歷官五政經考二十未能亨通
纔及令長臣夙荷嚴訓累登清秩頻遷省闈又拜掖垣
地近班榮臣則過量途遙日暮父乃后時在公府有偷
榮之責於私庭無報德之效反慚烏鳥徒厠鴛鴻伏望
降臣一外官特乞微恩稍霑臣父玄宗優詔獎之授嘉

之宋州司馬致仕

二十九年二月上謂宰臣曰洪州人鄔玄宗往在文明
年中傳玄元皇帝真誥於天后曰我國祚無窮當千萬
君遂遭禁錮因茲淪喪宜與追贈以慰泉壤其子瓊亦
依資授一官

天寶四載十二月隴右節度使皇甫惟明與一子五品
官賞功也

七載八月詔尚書左僕射兼右相吏部尚書李林甫曾

祖故長平郡王靈州道行軍大總管叔良贈太子少保
祖華陽郡開國公寧州刺史孝斌贈兵部尚書

十載正月河西節度使鴻臚卿員外置同正員攝御史
中丞權知朔方節度事安思順罷朔方節度加特進攝
御史大夫仍與一子官河西節度等使餘如故賞功也
安西四鎮節度特進兼鴻臚卿員外置同正員攝御史
中丞高仙芝生擒突騎施可汗吐蕃大首領及石國王
并可敦及傑師來獻上御勤政樓會羣臣引見加仙芝

開府儀同三司攝御史大夫仍與一子五品官餘並如故賞功也

十一載十一月以殿中少監安慶宗為太僕卿慶宗祿山之子以父任寵之是年哥舒翰為隴右節度使收石堡城獻功於朝詔與一子五品官

十二載又與一子五品官十三載又賜一

子五品官

十二載三月制曰褒德紀功前王之令典飾忠追遠有國之能事况乎嗣生大賢為朕良弼應五百之數該二

八之美調元而星辰以理論道而陰陽以和而寵命未
弘稱謂猶褊非所以崇推恩之重廣延賞之義也右相
兼文部尚書判度支魏國公揚國忠亡父贈持節魏郡
諸軍事守魏郡太守珣赤泉儲祉白環繼業膺積慶而
誕德鍾具美而挺生枝茂者根深流長者源濬是降英
裔阜成兆人熙載而百度惟清審衡而九流式序佐我
玄化格于皇天信為名賢實稟庭訓雖思人愛樹已有
疇庸之策而因條振葉宜益封崇之事俾以建旗之寵

仍起曳履之榮既旌徽烈用光泉壤可贈武部尚書鄭國公母張氏可贈鄭國夫人

十二月以安祿山男慶緒為衛尉卿詔曰王者出師登壇擇將忠臣受任幹蠱成功則君賞其勤父成其訓名教斯在寵秩是崇銀青光祿大夫鴻臚卿員外置同正員兼廣陽郡太守同范陽節度副使上柱國柳城縣開國男安慶緒門傳忠孝之義庭稟韜鈴之畧志氣剛決固敵是求遂使揄塞息警抑城罷鋒百勝深謀舉無遺

策可旌上將之功用叶中行之吉可特進行衛尉卿兼廣陵太守餘如故

十三載二月詔武德功臣及貞觀初宰輔等緬想忠義感會風雲用集大勳肇興王業其有子孫零落冠冕陵夷無任官守者宜令所司勘責依資與一人京官唐初功臣績參締構錄勞念舊每寘于懷普恩之外宜放一子出身如已有出身所司依資與一官

十四年賜朔方節度副使靈武郡太守攝御史大夫安

思順祖左玉鈐衛即將

史失其名

為武部尚書考右羽林軍

大將軍波主為太子太師

十五年帝在成都詔文部尚書平章事房瑄與子官盧
從愿為吏部侍郎典選六年前后無及之者帝嘉之特
與一子官從愿上疏乞田恩贈父乃贈其父吉陽丞敬
一為鄭州長史

牛仙客為工部尚書同中書門下三品贈其父意為禮
部尚書祖會為涇州刺史

張延賞中書令張嘉貞之子初名寶符召見賜名延賞
取賞延于世之義特授左司禦率府兵曹參軍

王君奭判涼州都督封晉昌伯拜其父為少府監仍聽
致仕帝又嘗於廣遠樓引君奭及妻夏氏設宴賜以金
帛

肅宗至德二年十二月御丹鳳樓大赦詔武德開元及
蜀郡靈武元從功臣有先亡沒死王事者並加優贈各
與子孫一人官其赴蜀郡靈武元從官及在路扈從官

三品已上與一子官四品已下與一子出身六品已下
量與進改

乾元元年正月大赦詔陷在賊境為其殺戮身死者三品已
上各與追贈仍各與一子官五品已上一子出身六品
已下量事追贈其元從聖皇天帝至成都府文武官五
品已上宜與一子官六品已下超資進改聖皇至成都
府后到官及靈州寧州首末扈從三品已上與一子官
五品已上放一子出身情願回授周親及親近亦聽唐

元功臣身亡沒者子孫一人加一階其諸道節度下將士三品已下與一子官六品已上放一子出身自開元已來宰輔之家不為逆賊所污者與子孫一人官是月又以朔方節度副使開府儀同三司鴻臚卿論誠節可襲撥川郡王食實封一百戶仍與一子三品官鉗耳大福封維郊郡開國公實封一百戶李懷讓封沂國公食實封一百戶一子五品官舍利如珍食邑封一百戶與一子五品官王仲昇封沛國公與一子五品官呂崇貴

封鄆國公與一子五品官周皎封汝南郡開國公哥舒翰封朔方郡開國公與一子五品官白延崇封壽春郡開國公與一子五品官茶公榮封豫章郡開國公與一子五品官李靖封清河郡開國公食實封一百戶與一子五品官劉感義封彭城郡開國公與一子五品官上元元年九月涇原兩州團練兵馬使元從特進兼羽林軍大將軍同正員李元忠死王事帝以其子承恩襲其官爵

代宗寶應元年十二月封朔方節度使僕固懷恩妻賀魯氏為涼國夫人賜實封二百戶以功寵之也

二年正月戊子制曰功崇望重加以服章德厚流光延其懋賞爰益苴茅之典並明幹蠶之才副元帥太尉兼侍中都知河南淮南淮西山南東道諸節度行營事上柱國臨淮郡李光弼元勳濟代公輔推賢宣大化之神明總專征之師律自出征移鎮距海負河連率百城旌旗千里東郊誓衆雅繼魯侯之功北伐擁旄首稱漢將

之畧高牙罷設重鼎斯調尤知武庫之寶實在雲臺之
右疇其真食羨以保家僉議允諧舊章斯舉敬哉有土
更載丹書之盟鯉也趨庭宜升紫綬之寵可加食實封
二百戶仍與一子官階三品餘並如故

二月乙未以河北副元帥僕固懷恩兵馬使高輔成為
檢校太子少傅兼御史中丞賜實封三百戶與一子五
品官朔方都知兵馬使僕固瑒檢校太子少師封定襄
郡王賜實封五百戶莊宅各一所與一子五品官朔方

右廂兵馬使高彥崇檢校太子賓客賜實封三百戶莊宅各一所與一子五品官

廣德元年七月上尊號大赦改元制河北副元帥僕固懷恩宜兼太保仍與一子三品官二子四品官河南副元帥李光弼與一子三品官幽州節度使李懷仙與一子三品官李抱玉郭英乂辛雲京侯希逸田神功孫志直白孝德令狐彰各與一子五品官李寶臣薛嵩田承嗣張獻誠等各與一子五品官魚朝恩寄崇師律程元

振勳高佐命仍與一子五品官僕固瑒高彥崇渾白進
李建義李光逸揚崇光李懷光張如岳白元光溫如雅
拓拔澄必高暉盧欽文成惟良曹楚玉等各與一子五
品官加實封一百戶仍各賜鐵券以名藏太廟畫像於
凌煙閣并冠難已來將相勳業高者其名籍圖畫亦准
此子儀與一子四品官苗晉卿劉晏裴遵慶元載各與
一子四品官并階加實封一百戶儀王及彭王已下男
未有官者並准舊例與官及封永穆并長樂已下公主

及郡縣主嗣郡王等各與一子官皇親五等已上諸親三等已上各與一子出身二王後各與一子官諸道節度觀察使立功將士其父兄在無官者依子文武與官已歿者追贈陣亡將士襲父官爵

二年郭子儀為關內河東副元帥加尚書令上表陳讓詔荅所讓者依仍以其子晞兼御史大夫嘉其父讓也大曆三年二月以試太常卿郭曜為太子賓客曜子儀長子特拜正員三品寵之也

四年三月追贈宰臣王縉祖故太常寺協律郎胄為兵部尚書祖母程氏為趙國夫人杜鴻漸祖故益州長史慎行為尚書左僕射祖母蕭氏為滕國夫人元載祖故左衛郎將敬同為兵部尚書祖母劉氏為沛國夫人李抱玉祖左武衛郎將文成為吏部尚書祖母張氏冀國夫人及載亡母李氏為涼國夫人推恩也十一月滑亳節度使令狐彰淄青節度使李正己並遣男朝謁詔以彰男建兼御史中丞正己男納兼侍御史仍賜金紫

十年七月詔劍南西川節度使崔寧賜一子五品官賞
功也

十二年四月詔曰往者大盜亂華梁宋偏懼其害危城
絕援折骸累月南霽雲真心壯節凌邁臧洪殞命敵場
凜然生氣宜以其子為歙州別駕

七月詔曰頃者逆豎靈耀阻兵大梁淮西都虞候試太
常卿贈揚州大都督張自勉往觀釁焉奉議正詞無所
屈撓賊臣肆恣斃於鈇鑕朕用憫焉雖錫命之恩已旌

寔窳而賞延之典宜及子孫可追贈實封五十戶是年賜朔方都知兵馬使李懷光亡母甘露寺尼正則謚智母禪師官給葬事寵武臣也

德宗以大厯十四年五月即位六月御丹鳳樓大赦天下詔武德已來宰相功臣名跡崇高并至德已來將相功效明著已亡歿者量加贈謚子孫沉翳者量與官諸州刺史及嘗參官父現在未有官者量與五品致仕官及階父母亡歿與贈官及邑號戊子贈驍衛將軍代國

公安金藏兵部尚書授其子承恩銀青光祿大夫試殿
中監兼廬州長史

建中四年四月贈故魏博節度都虞候兼御史中丞衛
嘗寧太子太師賜實封二百戶委馬燧懷光境上以禮
致祭仍與抱真李芄孝忠日知等訪其妻孥親族具以
名聞有子者便以父官爵授之子孫三代已來過犯者
減一等論所賜實封載之典冊勿令廢絕是年敬長皇
后弟吳淑使于朱泚泚謀逆已決因害淑于客館之前

德宗聞而哀悼久之淑嫡子與正員五品官

興元元年六月京畿副元帥李晟平朱泚收京師拜司徒詔贈晟父欽太子太保母王氏代國夫人

七月李懷光擁兵河中以給事中孔巢父充宣慰使遇害德宗聞而驚悼久之授一子正員官是月御丹鳳樓大赦天下詔司徒兼中書令晟與一子五品正員京官侍中璵與一子六品正員京官駱元光尚可孤韓遊瓌戴休顏各與一子七品正員官諸道節度使及行在都

知兵馬使都虞候扈從左右金吾六軍大將軍各與一子八品正員官都團練使觀察使各與一子官

貞元元年十一月癸卯日南至祀園丘禮畢詔曰司徒晟宜與一子五品正員官是年河東節度使馬燧平河中李懷光德宗下詔褒美遷光祿大夫兼侍中仍與一子五品正員官渾瑊為河中同陝虢等州節度既平李懷光以功加檢校司空與一子五品正員官并階

二年四月李希烈平詔曰叛臣希烈竊據淮沂師旅一

興綿聯莫解勞服者從役不暇受汚者無路自新通邑
化為丘墟遺骸遍於原野每念及此心傷涕流自昔勞
師者靡有不悔以虞舜之聖屈於苗人漢武之強弊於
戎虜矧乎德猶不逮力或未全我其永懷亦以自警乃
者下哀痛之詔布寬大之恩普天載新殊化畢宥然而
尚勞師旅禦捍封陞有累歲離棄室家有經時不解甲
胄忠雖為國咎實在君子民若斯寧不知愧賴將相士
旅一其誠心奮揚武威慎固疆宇遠人思服元惡就誅

蒸黎方致於安寧後戍永期於休息懋官以旌美賜宴以勞旋賞不踰時蓋遵彝典都統檢校司空平章事劉玄佐宜與子孫一人五品正員官節度使檢校右僕射李澄檢校兵部尚書曲環檢校戶部尚書李臯兼御史大夫樊澤等各與子孫一人七品正員官都防禦使工部尚書賈耽都團練使御史大夫盧玄卿張建封等各與子孫一人八品正員官檢校司空平章事李抱真檢校司空平章事李納檢校右僕射平章事韓滉工部尚

書田緒等各遣將士五千人赴河南行營同討不庭厥
有成績抱真納混各與子孫一人六品正員官緒與子
孫一人八品正員官

三年七月詔曰乃者吐蕃犯塞毒我生靈倣擾隴東深
入河曲朕以兵戎粗定傷痍未瘳務息戰伐之謀將遂
通和之請亦知戎醜志在貪婪重違修睦之詞迺允尋
盟之會果為隱匿變發墮宮縱犬羊兇狡之羣乘文武
信誠之衆蒼黃陷沒深用惻然此皆繇朕之不明致其

若此既無德於萬寓實有愧於四方宵旰貽憂何嗟而
及今兵部尚書崔漢衡等皆國之良士朝之蓋臣嬰繫
穹廬眇然殊域念其家室或未離於屢空祿以錫男庶
或資於薄俸漢衡宜與一子七品官司勳員外郎鄭叔
矩檢校戶部郎中路泌殿中侍御史韓奔及大將孟日
華辛榮李至言范澄王良賁樂演明陽皆權文成等各
與一子八品官試右金吾兵曹參軍袁同直前榆次尉
裴頤及副兵馬使以上各與一子九品官仍委本使即

具名銜聞奏

四年正月一日赦書天下刺史與一子正員官

七月詔以太尉兼中書令西平郡王晟長子試大理評事兼監察御史愿為銀青光祿大夫太子賓客仍賜上柱國唐制公卿嫡嗣皆自命而后言於有司帝以晟功高特為命嫡且寵異以兩階勳俾其父子並建門戟

六年十一月庚午南郊畢詔宰相及東都留守六軍統軍諸道節度使神策神武金吾六軍都團練防禦觀察

使京兆河南尹正員尚書御史臺長官太常卿各與一
子官故尚父子儀與一子五品正員官如已五品已上
量與改轉贈太尉秀實與一子官張巡許遠南霽雲顏
真卿顏杲卿各與一子正員官

七年二月授張巡男去疾許遠男峴南霽雲男承嗣顏
真卿男頤杲卿孫謨之官旌忠烈之後也

五月門下侍郎平章事實參祖尚衣奉御瑾特贈揚州
大都督父絳州開喜尉審言特贈吏部尚書祖母段氏

追封武威郡太夫人母母氏追封鄭國太夫人參將附
祖禰新廟故特加寵贈

九年十一月乙酉日南至郊祀禮畢大赦天下故尚父
子儀贈太師晟贈太尉秀實各與一子六品正員官是
年詔曰前利州刺史狄博濟惟乃曾祖梁文惠公啟佑
天后定紹復之策幽贊中興宜錫祚裔垂於無窮矧博
濟郡人懷之理有異等可衛尉少卿

十一年十一月辛亥以前太子賓客李愿為左領軍大

將軍李憑為右威衛大將軍依前兼中丞皆太尉晟之子以免喪故晟諸子同日授官者凡九人

十四年贈故衡州刺史王繹洪州都督以其弟緝故也順宗初即位制曰武德以來配饗功臣及張巡許遠南霽雲顏真卿杲卿等子孫中各與一人正員官故尚父子儀贈太師晟太尉秀實子孫中各與一人正員官五品及諸州府長史及京嘗參官父現在未有官者並與五品致仕官及階父歿母存者與邑號父母亡歿量與

追贈陝州元從寶應功臣興元元從奉天定難功臣賜
爵勳有差亡歿者與追贈中書門下節度東都留守度
支鹽鐵等使京兆郡觀察招討等使及神策神威金吾
六軍將大將軍英武威遠鎮國軍使隴右經畧軍使節
度留後各與一子官

憲宗元和元年正月冊尊號詔中書門下及外使宰相
與一子七品官東都留守六軍大將等與一子出身東
官並與改官其撰冊文官等各與一子官及勳爵有差

二年正月辛卯有事于南郊大赦天下制故尚父子儀
太師晟太尉秀實及顏真卿杲卿張巡許遠南霽雲及
配饗功臣與一子官及出身有差

七月錄配饗功臣之後以蘇瓌孫繫為京兆府司錄參
軍崔玄暉孫元方張說孫螯並為監察御史狄仁傑孫
玄範為左拾遺詔曰朕惟承累聖之業追先正之勞濟
于艱難代有勳烈既而本根已遠枝葉稍零詔書屢勤
于褒飾有司不忘于遴簡一命宰府載弘搜揚錄其先

功果復良嗣蘇繫等咸以茂學懿行勗于前修皆人之
領袖族之孤趙類能而舉各命以官或任以紉絕或參
于諫烈庶乎旌太傅之德將擬南城之封紹鄰侯之裔
不俟東門之感忠義獲寵古今同之后數日又得敬暉
孫元亮袁恕已孫德師相次錄用

三年四月戊寅謚張柬之為文貞桓彥範為忠烈敬暉
為貞烈崔玄暉為文忠袁恕已為忠烈先是柬之曾孫
曠以謚事詣中書陳訴宰臣上聞因令有司授曠官仍

定東之等謚焉

五年三月以贈給事王澹之子璋為左清道率府曹參軍澹因李鏐為亂遇害故錄其嗣是年劉濟為幽州節度使討鎮州王承宗累破樂壽等縣賞功頗厚仍與一子孫六品官者凡四人

六年七月御延英對宰臣李吉甫奏曰臣伏見代宗時滑州節度令狐彰臨終上表悉以土地兵甲籍上朝廷遣諸子隨表歸闕代宗以彰遺表宣示百寮付史館當

時在位者聞之無不感歎今惟有次子通在臣每感彰
同時河朔諸鎮傅子傳孫無不燻灼數代唯彰忠義感
激奉國忘家遣子入朝以土地歸于先帝貞元中長子
建坐事死施州幼子運亦無罪流死于歸州欲使忠義
者何所激勸今通幸存得遇明聖伏乞陛下召對與語
如堪進用望稍優獎帝因語宰臣曰德宗英靈冠于百
王但臨事剛斷宰臣不能規諫朕比在藩邸雖則幼年
記得數事未副外望豈非宰臣懷祿畏避不言遂令四

方傳說此是宰臣有負先聖卿等當以此為鑒戒因授
通贊善大夫

九年八月庚寅錄功臣之后以左神策軍華原鎮遏兵
馬使兼御史大夫康志寧為檢校左騎常侍兼左龍武
軍將軍知軍事河南府永寧縣令李晏為京兆府高陵
縣令左神策正將揚嶼為袁州司馬薛之達夔州司馬
蘇縝為隴州司馬李克展為鳳翔府倉曹李融為常州
司戶李仲墓為襄州司倉田知清為冀王府功曹李元

正為循王府功曹詔曰君臣運合故徇國以毀家勸賞
義明故褒功而顯節存則酬其爵祿歿則錄其子孫然
後忠義不遺典章斯在故茲晉隰等州觀察使檢校兵部
尚書康日知故徐州刺史兼御史大夫李洎等一十家
皆有茂功歲于盟府故命採訪后嗣光賁前人今志寧
等或服戎著績或從官有成或投跡運府之中或滯才
州縣之職咸加甄錄各茂官榮庶乎受祿者無忘于聿
修懷忠者使其必報勉膺寵擢無替前勞

十二年七月贈著作郎權皇太子太保臯前贈秘書監至是因子德輿相為立家廟復有是贈

十三年正月赦書故尚父子儀贈太師晟贈太尉秀實及顏真卿杲卿張巡許遠南霽雲與一子官及出身有差

十四年三月以撫州司馬同正令狐通為右衛將軍給事中崔植封詔上言通嘗刺壽州用兵失律前罪未塞不宜遽加獎用命宰臣諭植以通父彰有功不忍棄其

子詔遂行

七月帝御宣政殿冊尊號禮畢大赦天下故尚父子儀
贈太師晟贈太尉秀實及張巡許遠南霽雲顏真卿杲
卿子孫各與官及出身是月宣武軍節度使韓弘與一
子七品正員官

九月辛丑以魏博田弘正之兄相州刺史田融為檢校
刑部尚書兼太子賓客東都留守

穆宗以元和十五年正月即位二月御丹鳳樓大赦詔

中書門下及節度等使東都留守度支鹽鐵使京兆尹
諸軍使等賜一子官有差武德已來配饗及第一等功
臣并張巡許遠南霽雲顏真卿杲卿等尚父子儀贈太
師晟贈太尉秀實子孫中與一子官有差其中有才行
堪在臺省者量才敘用

六月舉勳賢之後堪任臺省官者以大理正段文通為
殿中侍御史渭南縣尉郭承嘏為監察御史前淮南營
田副使顏頤為水部員外郎長安縣丞顏諗為大理正

又以宰臣韓弘祖望贈右僕射父海贈太師令狐楚祖
崇豪贈吏部尚書父承簡贈禮部尚書蕭俛祖華贈
太保父嘗贈吏部尚書段文昌祖懷皎贈給事中文諤
贈左僕射其祖母及母並加封贈又封蕭俛母韋氏岐
國太夫人是月魏博節度使檢校司徒兼侍中田弘正
祖延暉贈吏部尚書父庭玠贈右僕射淮南節度使檢
校左僕射平章事李夷簡祖察言贈兵部尚書父自仙
贈右僕射河東節度使檢校左僕射兼門下侍郎平章

事裴度祖有鄰贈右僕射父淑贈太子太保幽州節度使檢校司空平章事劉總祖憚贈太師其祖母及母並加封爵贈是年邠寧節度使李光顏來朝詔與一子正員四品嘗參官

長慶元年正月辛亥赦詔故尚父汾陽王及贈太師晟贈太尉秀實各與一子官八品顏真卿杲卿張巡許遠南霽雲各與一子出身武德以來功臣子孫量加獎用中書門下及節度使帶平章事者各與一子八品正員

官祖父母及父母並與贈官封父歿母存者與邑號已
贈已封者更與追贈及邑號禮儀使大禮使度支鹽鐵
使京兆尹各與一子出身文武當參官并致仕及諸道
節度觀察經畧等使及神策等諸軍使父見存者量與
致仕官母存者與邑號父母亡歿與贈官及邑號東都
留守及諸道節度觀察經畧等使神策金吾大軍將軍
威遠鎮國軍使各與一子出身四月以幽州劉總籍土
地歸闕授其弟約及男等一十一人官領郡符加命服

者五人升朝班佐環衛者六人是月贈廬江縣令崔嬰甫吏部侍郎嬰甫宰相植之父也植出繼伯父祐甫及是以情上請故特追贈

七年大赦制撰冊文官中書侍郎平章事崔植與一子正員官

四年八月以太僕寺主簿李宏為河南府兵曹掾獲嘉令蔣郵為伊陽令安史之亂宏祖愷郵祖清皆著名節故特制寵之

敬宗即位初大赦詔元和已來兩河節度使全家歸闕者如張茂昭王承元程權劉總田宏正等五家各與一子正員官

寶曆元年正月以前右補闕魏猗為湖州司馬猗文貞公徵之孫也朝廷以忠賢之后寵為諫官猗病不克拜故有是命

二年四月以姚元崇玄孫前京兆府富平縣尉合為監察御史以宋璟曾孫前太常寺大樂署令堅為京兆府

富平縣尉

文宗太和元年正月敕詔今年正月十四日上皇太后尊號及朕受冊進寶撰即位冊文承旨宣制等官各與一子正員七品官是月平盧軍節度使康至睦上言故萊州刺史李庭遠當李師古節制東平之日庭遠為屬郡屢陳忠順以沮奸兇繇是父子二人俱為師古所害其幼子可舉纔十歲逐在海中至今猶在臣已署軍職請兼授管內一官遂以淄州高苑縣主簿命之又詔涇

原節度使李祐與一子五品正員官

二年三月尚書右僕射同中書門下平章事裴度進封
太原郡公中書侍郎同中書門下平章事韋處厚進封
靈昌郡公裴度實易直各請封爵回授一男

六月以故中書令褚遂良五代孫虔為汝州臨汝縣尉
內史狄仁傑曾孫前鄉貢明經元封為懷州修武縣尉
故侍中宋璟曾孫渤為岳州沅江縣尉故中書侍郎平
章事李元紘曾孫伉為鄧州向城縣尉詔曰褚遂良五

代孫虔等朕詳觀列聖紀冊祖宗盛業燦然在前其或
道有污崇政有善否未始不繫乎當時輔弼嘗因便殿
言諸宰臣勉其裨益協心推戴且以去歲乙巳登應門
敷大號俾疇賢相以訪遺裔或才器擅價各列官業或
血食不繼宗祊已蕪如遂良之委笏面諍名垂史書仁
傑之恢復廟社事形先覺宗璟之文吏骨鯁功叅治平
元紘之守規畫一時成有裕其胄僅存不絕如髮各授
邑吏使其自試十月授故侍中魏徵四代孫可則鄧州

南陽縣尉侍中魏知古曾孫處訥潭州湘鄉縣尉故左
僕射裴冕曾孫行實虢州司功參軍詔曰武德已來輔
相之臣以道致君以勞定國若贈司空徽故侍中知古
贈太尉冕語其功次皆在第一清風餘祉宜及乎後昆
爾等乃其曾孫式叶搜獎俾奉貽謀之慶用覃延賞之
恩各命以官勉思祖德

三年五月滄州平庚寅加李祐銀青光祿大夫檢校左
僕射仍賜一子五品正員官并加實封三百戶

四年七月丙戌以故中書令蕭瑀五代孫耽故尚書左僕射同中書門下三品蘇瓌四代孫翔故中書侍郎同中書門下平章事陸象先四代孫量並為釋褐叅軍文學

五年七月癸卯錄國初功臣衛國公李靖等七家裔嗣命之以官

九年十月以前同州長春宮巡官試秘書省校書郎魏謩為右拾遺帝因讀貞觀政要思文貞公魏徵之德訪

其後得暮而不次用之

開成元年正月故詔河朔節將以州縣歸國者有張茂
昭田弘正程權各與一子官子弟堪任使者委中書門
下量加引用又詔曰劉總王承元元和中以河朔郡縣
歸朝廷悉宜以新赦書張茂昭例賜一子正員官

閏五月癸丑以前殿中監渾鐵為壽州刺史鐵太師瑊
子也宰相以瑊扶危之勳諸子凋落賞延之道宜加優
寵初以壽州為請帝曰鐵勳臣子豈可牧人仲尼以為

不如多與之邑。今我念其先子女玉帛無愛焉，使之辭服美食可也。宰臣以鐵常為郡有幹勤之名，屢薦之，故有是命。

三年四月，以鄧州南陽縣尉魏可則為櫟陽縣尉。時帝於閣內召起居舍人魏謩對問文貞之疇績，因訪其族裔，故有是命。又以博陵王崔玄暉曾孫前商州防禦判官兼殿中侍御史郢為監察御史，以平陽王敬暉曾孫前試太子通事舍人元膺為河南縣丞，以漢陽王張柬

之玄孫前宜城縣尉憬為壽安縣尉以南陽王素恕已
曾孫鄉貢進士德文為秘書省校書郎初御史中丞狄
兼暮帝前語及叔祖仁傑與五王協心裨贊王室帝因
問其后搜揚獎擢唯桓彥範之后訪無其人

五月戊辰以故隸州刺史樂濛男存固為鄆州壽張縣
主簿大和初李同捷阻兵滄景濛不從其亂為同捷所
囚舉家遇害存固年少隱於吏家因得脫免至是錄濛
忠節故命以官

十一月己未以前河東縣尉長孫鈞為河中府猗氏縣令制云朕每覽國史見太尉無忌之事未嘗不廢卷咨嘆遐想其人訪其裔孫用申甄獎

四年十月丙辰海州節度使劉約上言王鏐之子故德州刺史王稷在任有善政郡人愛之為李全畧所殺家無遺類有男叔泰年五歲郡人宋忠獻潛收養之今已成長臣察知其事忠獻已補軍職叔泰送歸其宗詔王鏐累朝宣力王稷一旦捐軀須錄遺孤微申憫念王叔

泰委吏部與九品官令主祭祀

昭宗天祐元年大赦詔武德以來立功効節者在策書者並與搜訪子孫繼嗣量材敘用

後唐莊宗同光元年十月平汴州詔歿王事者如有子孫成立堪任使者並量材甄錄

二年八月壬午以檢校戶部尚書守邢州長史郭廷誨可檢校右僕射守左衛大將軍檢校工部尚書左武衛將軍同正郭廷信可簡校右僕射守左驍衛大將軍皆

樞密使崇韜之子也

朱友謙初仕梁為河東節度使莊宗誅汴孽自河中來朝以其子同州節度使令德為遂州節度使令錫為許州節度使諸子二十石者六七將校割符者五六恩寵之盛時無比隆

明宗天成二年二月勅朕以握圖御宇應運承祧副億兆之歡心賴英雄之叶力雖疇庸之命已徧及於勳賢而延賞之恩宜更加於骨肉應諸道節度使男及親嫡

骨肉未霑恩命者特許上聞

五月勅朕自恭承景運祇荷丕圖念寰海生靈錄勳賢
骨肉承家莫尚於孝報國莫大於忠忠孝兩全古今所
重在朝文武臣僚并諸道節度刺史等有父母者宜徧
加恩澤使天下之為人父者知感為人子者知恩競揚
家國之風顯著君臣之道

三年二月己丑勅准二年五月十二日勅中外臣僚及
諸道節度使等有父母者并許加恩例凡居臣下盡抱

公忠共為朝廷各榮家族具慶者繼頌恩渥俾光晨耀
昏既亡者宜澤泉扃以光封樹應中外羣臣諸道節度
防禦團練刺史等父母亡歿者并與追贈追封

五月丁巳勅自家刑國內平外成天子立言備有關雎
之樂春秋垂訓非無石窀之封况夫尊於朝妻貴於室
所宜從爵各顯家肥朝臣及諸道節度使妻室未有稱
號者宜各加恩

四年正月幽州節度使趙德鈞奏臣孫美年五歲默念

何論孝經今於汴州敘解就試勅都尉之子太尉之孫
能念儒書備彰家訓不勞就試特與成名宜賜別勅及
第仍附今年春榜

長興元年二月郊祀畢下制曰其朝臣及藩侯郡守等
亡父母祖父母及父母在并妻室未霑恩命者與追贈
及敘封又以故汴州馬步軍都指揮使馬彥超男壽哥
為雒州長史仍改名承祚彥超天成初為汴州都指揮
使朱守殷將謀叛逆引彥超計事彥超不從為守殷所

害及誅守殷帝念彥超能執節守義而延賞其子

六月甲戌以魏徵八代孫韶為安定縣主簿八月千牛副使檢校刑部尚書夏光銳起復雲麾將軍檢校右僕射為澤州刺史光銳即故遂州節度使魯奇之子也朝廷念勳故有是命

張希崇為汝州防禦使母先為尼賜紫衣師號

末帝清泰二年九月詔曰安崇贊父有力於皇家著之青史雖然得罪於先朝此日特行於延賞况頻逢赦宥

可繼烝嘗亦欲忠義之士知朕念勳之旨擢為上佐爾
惟勉旃特授孟州司馬崇贊故明宗朝樞密使重誨之
子也故有是命

三年二月以太子正字夏光隱為國子太學博士故遂
州節度使魯奇之子以父歿於本州以死持董璋而毀
族故有是命

晉高祖天福二年二月勅曰朕以爰膺寶曆方啟金行
既風教之誕敷諒寰區之漸泰而繇股肱元輔藩郡重

臣咸著大功同為至治雖列地顯爵盡布新恩而追遠
奉先猶虧舊典宜示褒功之寵俾祛風樹之悲自在朝
文武百僚至見任刺史先代未封贈者據品秩與封贈
已封贈三代者與加封贈又在朝宰臣已下臣僚外任
刺史已上母妻未敘封已敘封等朕以削平禍亂開創
基扈漸成銷偃之期永協興隆之運亦繇左右元輔中
外勳臣弼予一人宅是四海茂績雖彰於王室覃恩未
及於私門德盛母儀貴而因子禮優婦道榮必從夫宜

加渙汗之恩顯示封崇之典其未敘封者據品秩與敘封已敘封國號者與進封

七月丁卯勅曰朕聞王者懷於有仁所以享靈長之運賞延於世所以勸忠烈之臣唐開府儀同三司守太尉兼中書令西平王上柱國岐國公食邑三千戶食實封一千五百戶贈太師謚曰忠武李晟五代孫職以爾上祖西平王昔在德宗皇帝幸梁汴之歲而有保定大功中興返正扶持社稷之力載諸史氏予嘉乃德日篤不

忘宜升五代之孫禪陟六聯之位光乃前烈煥乎後昆
可將仕郎耀州司戶參軍

八月制曰或無辜被害或徇節忘生既抱沉寃宜伸贈
典應自張從賓作亂已來諸色員僚內有死於王事者
並與追贈有子孫者量材敘錄

十月戊戌詔曰恩隆加等故有明文道在恤孤宜弘異
渥自去年出師已來諸軍將校有歿於王事者其子孫
並與量材敘錄

六年八月壬寅制應河東起義之初佐命及收復鄴都
汜水立功臣寮將校等其亡歿者更與追贈子孫已有
職官者與遷改未有身名者與敘用

少帝開運中以宰臣桑維翰長子坦為屯田員外郎次
子塤為秘書郎維翰謂同列曰漢代三公之子為郎廢
已久矣近或行之甚誼外議乃抗表固讓不受尋改坦
為大理司直塤為秘書省正字議者美之

漢隱帝乾祐元年以宰臣楊邠子右贊善大夫廷侃為

比部員外郎宰臣蘇逢吉從兄前洺州團練推官晏為
司門員外郎

周太祖廣順二年三月補故控鶴指揮使郭超長男重
均充左番殿直次男重友充右番殿直以父歿王事故
也

世宗顯德三年十二月辛巳贈故開封府襄邑縣令劉
居方右補闕仍賜其男士衡北學究出身居方累宰大
邑甚得撫字之要帝知之故特加贈典而復賞其子焉

四年五月甲寅以江南僞命前壽州衙內都指揮使劉
崇讚為檢校太保懷州刺史崇讚故鄆州節度使仁贍
子也以其父舉壽陽來降故有是命

冊府元龜卷一百三十一